

Itsarooq aappareeqarpoq qitornaqanngitsunik, tassa
qitorntartaartalaruarlutik toqusortuaannaramik.
Ilaanni ernertaaramik aasiit erniinnaq toqussammat
Kaassassummik atserpaat. Kiisa pisuttalerpoq suli
ajorani, angajoqqaavisalu qujageqaat qanorlu pial-
laatinngui tamaasa pilliutigisarlugit.

Taamatut ingerlaniarlutik angajoqqaavi ataatsikkut
napparamik tulleriiginnarlutik toqupput. Kaassassuk
angajoqqaaveruppoq.

Angajoqqaaverummat illoqataasa pilerngappaat.
Piniarluarnersaasa ilaata ernersiartaarivaa, angajoq-
qaarsiartaavisalu tigummialeqqaaramikku asaqaat.
Kisianni Kaassassuk timmilluni ingasappallaaleqimmat
maajugilerlugu igiinnarpaat. Iginniariaraat illoqataasa
ilaata qujaruppa ernesriartaaralugulu. Taannaqami
pilerpoq, allat tigugaluarlugu igikkaat allat tigugaat.
Kiisa kingulliup paamut igimmagu igalermiorsuata
niviarsiatoqqap naakkigilerlugu tigugamiuk ernesiar-
taarivaa.



Neriartoqqusillutik suaartallaraangata neriartortut
isaareersullu Kaassassuk kingullerpaalluni iseriartukasak-
kaangami katammi nuiinnarluni uniinnartarpooq, tassa katak
portungaarmat Kaassassuup mikinermik nammineq qaqisin-
naannginnamiuk. Anguterpassuit pilerngukkaangamikku
qaqinniullugu. Allakkut qaquinneq ajorpaat kisianni
sorlussuisigut, assatik peqillugit sorluinut manngullugit.
Taamaasillutik Kaassassuup sorlussui kisimik alliartorput.

Nerilillaraangata akuamininnguaq neqitaqangingajat-
toq nerillaaraa. Nungullugulu allamik tigusinialerp
arlaata appiuttaraa: – Kaassassuk aqqalavallaaqaaq,
misissorsiuk, immaqaasiit kigutitaarsimavoq!

Ornikkaangamikku aatsarteriarlugu aarimmi:
– Kigutitaareersimagamiaasiit! Taama kigutaar-
taraat.

Kigutituakasini peeraangassuk nerisani
tamuagaluarlugu nungunneq ajuleraangagu
asasiata, angutip utoqqarsuup naakkigin-
nittup, savimmik tunisaraa. Aatsaallu
iluamik nerisinnaanngortarpooq.






Meeraqatini ilagalugit anileraangat meeraqataasa eqqissitinneq ajorpaat naalliutsillugu. Nilliasorsuullutik ornikkaangamikku tikillulgulu nunamut uppitikkunikku, ilaasa kivileeraat, ilaasa sorlussui annanik immeraat. Iplivissuni qimakkaanganni meriarsarluni sorlussuani saleriarlugit angerlaannartarpoq.

Meeraqatinilu naaligaleraangata usoruppalaaleraangat asasiata naalikkiortarpaa. Aniniariartorli meeraqataasa arpaannaq ornikkaangamikku naaligaa nallortarpaat, kiisa asasiata sanaatissaarpaan.

Ilaanniaasit angutip utoqqarsuup asasiata Kaassassuk meeraqatimininit naalliutsitaasoq isigereerlugu naakkigilerlugu qimammassuk ornillugu oqarfigilerpaa: – Uumaannguakasiingaa, naalliutsitaavallaqaatit, angusinnaagukku pisuttuarniarna pavunga Talorsuarnut.

Imaangaa suaartarumaarputit: – "Pissaap Inua qaali, maaniippunga!" Pissaallu Inuata ornikkaluarpatit ersinaveersaarumaarputit.

Taamak oqarfigimmani angerlarami puigunngilaa.




Aqaguani ullaakkut iterami Talorsuarnukarniarluni pikilerpoq.
Arnarsiusuata isigigaluarpa pikerujoortoq, sumilli oqarfingin-
ngilaa.

Tappavunga ingerlaatigaluni orpigannguit aminnersiorlugit
nusunniaraluaraangamigit, ujarannguillu minnersiorlugit
kivinniaraluaraangamigit, artorpai. Taamak nukeqanngitsigaaq.

Talorsuarnut pigami kangimuinnarsuaq suaartalerpoq: – Pissaap
Inua qaali, maaniippunga! Pissaap Inua qaali, maaniippunga!

Tassani suaartarniartoq erseriallarami qimmerujussuaq, soorlumi
nunamut tunnganngitsoq. Inuttut kiinalik nersutitut uppatilik.
Tikeriarluguasuuna oqallartoq: – Qangarsuarli taamatut qaaq-
quneqarama, aatsaat qaaqquneqaratarpunga. Pamiorsuannut
nermunniaqit, manngertillutit, issugiukkaluttuaqaakkit!



Kaassassuk ersinermik sajuttuinnaavoq, allatulli ajornaqimmat ornikkamiuk pamiorsuanut nermuppoq manngertillunilu. Kaavitilerpaa, kaavitilerpaa, naggataagullu erfagiullugu. Kaassassuk pilluni pilluni nikuimmat Pissaap Inuata oqarfiga: – Kingumut qiviaqii! Kingumut qiviariallarami, pinnguaqqat amerlassusii.

Asuuna Pissaap Inua oqallartoq: – Tamassa allineq ajuutitit!

Aappasaanik qaaqqummani aamma pamiorsuanut nermukkami tamatumuuna manngertinniariarluni issugiutillarmani orlunani naggataatigut nikorfareerpoq. Massakkut pingussat katatai ikileriarsimallutik. Pissaap Inuata oqarfiga: – Aqagu aggeqqinniarna!